

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XL No. 6
Marso 21, 2009
www.philippinerevolution.net

Editorial

Hustisya para kay Rebelyn Pitao kag tanan nga biktima sang pasista nga pagpamatay!

Ginlubong na si Rebelyn Pitao, anak ni Leoncio "Ka Parago" Pitao, puno sang 1st Pulang Bagani Command sang Bag-ong Hangaway sang Banwa (BHB) sa Southern Mindanao Region.


Pwersahan nga gindukot si Rebelyn sadtong gab-i sang Marso 4 samtang sakay sang traysikel sa Sityo Bago Aplaya, Barangay Bago Galleria, Davao City. Nakit-an ang iya bangkay sang masunod nga adlaw nga nagalutaw-lutaw sa ginhabuyan nga kanal sang irigasyon sa Purok 5, Barangay San Isidro, Carmen, Davao del Norte. Antes dalayon nga patyon, siya gingapos, ginbusalan, ginlugos, ginkuga, ginbuno sang *ice pick* kag labi nga ginpintasan.

Wala duda nga ang pagpatay kag pagtampalas nga ginhimo kay Rebelyn kabahin sang mahigko nga gera nga ginasulong sang Armed Forces of the Philippines (AFP) sa idalom sang Oplan Bantay Laya. Bangud indi sini madakup-dakop ang mga gerilya kag bangud sa sunud-sunod nga pagkalutos sang reaksyunaryong militar sa BHB, wala kaluoy nga gintarget

sang AFP ang mga sibilyan. Labi pa sini nga ginpahigko ang gera nga ginasulong sa pagtarget sang mga kamilya sang mga rebolusyonaryo.

Madumduman nga sadtong Hunyo 2008 ginpatay sang mga suldado sang AFP ang utod ni Ka Parago nga si Danilo. Antes pa sini, gamayan man mapatay sang mga elemento sang *death squad* sang AFP ang pangamay nga anak sang Pulang kumander. Hugot man nga ginapanilagan sang mga ahenteng paniktik sang reaksyunaryong hangaway ang isa pa ka anak nga babaye kag iban pa nga myembro sang kamilya ni Ka Parago.

Partikular nga ginatarget sang AFP si Ka Parago bangud sa sunud-sunod sini nga kalutusan sa pakig-engkwentro sa Pulang Bagani Command nga iya ginapamunuan. Ginatigayon sang mga berdugo nga militar ang pagpigis sa kamilya ni Ka Parago suno sa mandu sang ila mga mataas nga upisyal kag bilang bahin sang desperado nga kampanya nga waskon ang determinasyon niya kag sang mga Pulang hangaway sang BHB nga isulong ang rebolusyon sang banwa.



**Mga tampok sa
isyu nga ini...**

Pagpatay kay
Rebelyn, nag-ani sg
pagkundenar **PAHINA 3**

Balikatan: Salot
sa pangabuhian
PAHINA 5

Paghimakas agraryo
batuk sa kroni ni
Arroyo **PAHINA 9**

Kadungan nga ginatarget sang pasista nga hangaway ang ginapatihan nga baseng masa sang 1st Pulang Bagani Command sa Paquibato District, Davao City. Pila ka bulan na nga nakaagi sang pinakamabaskog nga kapintas sang AFP ang mga sibilyan diri. Madamo nga mangunguma ang ginbakol kag naningin biktima sang iban pa nga pagpang-abuso sa kamot sang pasistang militar. Bag-o gid lang nga ginpatay ang isa ka lider-masa nga nagapanguna sa pagpamatuk sa kalakasan militar sa Paquibato.

Abot-langit ang kaakig kag pagkunderar sang pumuluyong Pilipino kag tanan nga rebolusyonaryong pwersa sa pungsod sa makasiligni nga pagpatay kay Rebelyn. Ginmandu na sang Partido Komunista sang Pilipinas sa BHB nga arestuhon ang mga natumod nga responsable sa pagdukot, paglugos, pagtortur kag pagpatay sa iya.

Base sa panugod nga imbestigasyon, nagalab-ot sa 11 operatibang paniktik sang AFP ang imbolbado sa pagpatay kay Rebelyn. Gintipon ang mga operatiba nga ini halin sa lain-lain nga yunit sang AFP, pamatuod nga indi lang inisyatiba sang mga lokal nga pwersa

sang AFP ang krimen. Isa ini ka proyekto nga ginkoordinar halin sa mataas nga kumand sang pasistang militar. Hindi pwede nga magpa-ino ang rehimen ng Arroyo kag ang AFP sa ila responsibilidad sa krimen nga ini.

Sa katapusan, ang pinakaresponsable sa brutal nga pagpatay kay Rebelyn amo sanday Gloria Arroyo kag iya mga pasistang berdugo sa pagpanguna ni Executive Secretary Eduardo Ermita. Hayagan nga pagpakanubo sa kinaalam sang pumuluyo ang pagpamilit sang rehimen kag sang pasistang militar sini nga wala sila sang kahilabtan sa pagpatay kay Rebelyn.

Wala unod ang pagguwa sang Malacanang kag sang AFP nga kuno ginapaimbestigahan ang pagpatay kay Rebelyn. Paano mangin sinsero ang rehimen ng Arroyo nga maagum ang hustisya para kay Rebelyn kay si Gloria Arroyo mismo ang naghawan sang dalan kag nagsugyot nga matabo ang amo nga mga krimen sa kondukta sang kontra-rebolusyonaryong gera nga iya ginasu-long? Ang iya pagdayaw kag paghatag sang promosyon kag padya sa iya pinakapasista kag pinakaberdugo nga mga heneral direkta nga

pagbuyok sa AFP nga himuon ang amo nga makasiligni nga krimen.

Ginapatingkad lang sang pagkapatay kay Rebelyn ang indi na maisip nga mga pasistang krimen sang reaksyunaryong papet nga rehimen batuk sa pumuluyong Pilipino. Tampok diri ang mga ekstrahudisyal nga pagpamatay kag iban pa nga kalakasan sa mga sibilyan nga ginabilang sini nga kombatant sa nagaluntad nga gera sibil.

Sa pagtarget sini sang mga sibilyan, liwat ginapakita sang rehimen ng Arroyo ang tuman nga kata-lawon sini kag lubos nga kawad-on sang moral nga basehan nga mamuno.

Wala-tuo ang pagkunderar nga ginaani sang AFP kag rehimen ng Arroyo sa brutal nga pagkamatay ni Rebelyn. Labi nga nahamulag su-bong ang mapintas nga rehimen kag ang berdugo nga militar sini.

Nalubong na si Rebelyn pero indi tubtub san-o mapatay ang kalig-on kag determinasyon ni Ka Parago, sang Bag-ong Hangaway sang Banwa, sang bilog nga rebolusyonaryong hublag kag sang pumuluyong Pilipino nga isulong ang rebolusyonaryong paghimakas. Determinado ang mga rebolusyonaryong pwersa nga lagson ang mga nagbuhat, bistahon kag silutan ang mga kriminal nga pasistang berdugo nga nagpatay kay Rebelyn.

Ginapapula kag ginapainit sang dugo nanday Rebelyn, sang mga martir sang rebolusyon kag mga inosente nga biktima sang mahigko nga gera ni Arroyo ang dalan sang rebolusyonaryong paghimakas. Ang ila handumanan ang labi pa nga magapalig-on sa determinasyon sang rebolusyonaryong kahublagan nga pukanon ang berdugo nga rehimen ng Arroyo, isulong ang rebolusyonaryong paghimakas tubtub sa kadalag-an kag tukuron ang isa ka katilingban nga may matuod nga kahilwayan, hustisya kag kalino-ngan. **AB**



Tuig XL No. 6 Marso 21, 2009

Ang *Ang Bayan* ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa *Philippine Revolution Web Central* nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editoryal

Hustisya para kay Rebelyn Pitao	1
Malaparan nga pagkunderar sa pagpatay kay Rebelyn	3
Protesta batuk sa VFA kag Balikatan	4
Nicole, biktima na naman	5
Balikatan: Salot sa kabuhi	5
Adlaw sg kababainhan	6

Pagpanghalit sg pasistang estado

Napulo sibilyan, ginpatay sg militar	7
Mga eskwelahan iban pa, ginakampuhan	8

Mga aksyong militar sg BHB

Paghimakas agraryo batuk sa kroni ni Arroyo	9
Sin-o ang ara sa likod sg SLAC?	10

Balita	10
---------------	-----------

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas

Pagpatay kay Rebelyn Pitao, nagaani sang lapnagon nga pagkunderar

Nagalab-ot sa 5,000 katawo ang nagpasakup sa lubong ni Rebelyn Pitao sadtong Marso 14. Nagaawas ang ila kasubo kag kaakig samtang nagamartsa sa mga pangunahon nga karsada sang Davao City. Madamo sa mga nagtambong ang naghalin pa sa mga prubinsya sang Davao Oriental, Davao del Sur, Davao del Norte kag North Cotabato.

Isa sa mga nakiglubong si Davao City Mayor Rodrigo Duterte, nga nagpahayag sining karon lang nga pormal nga ginautod sang gubyerno sang syudad ang suporta sini sa kampanya sang Armed Forces of the Philippines batuk sa Bag-ong Hangaway sang Banwa (BHB) sa Paquibato District. Siling niya, ini bangud ang mga ginatarget sang militar sa ila kampanya amo ang mga sibilyan. Ang Paquibato District ang ginahulagan sang yunit sang BHB nga ginapamunuan sang amay ni Rebelyn.

Nag-ani sang malaparan nga pagkundera lunsay sa sulod kag guwa sang pungsod ang makasiligni nga krimen nga ginhimo sang mga pasistang militar kay Rebelyn.

Wala ginalauman sang pasistang kaaway nga magaawas ang kaakig sang pumuluyo sang dukuton kag patyon nila si Rebelyn, dalaga nga anak ni Leoncio Pitao (ukon Ka Parago) sang 1st Pulang Bagani Command. Isa ka adlaw lamang makaligad mabalita ang makasiligni nga krimen naglapnag ang mga poster sa mga karsada sang Davao City nga mabaskog nagapakamaut sa mga armadong gaway sang rehimeng US-Arroyo.


Sang saulugon sini ang Pangkalibutanon nga Adlaw sang Kababainhang Anakbalhas sining Marso 8, gintawag sang GABRIELA nga mapait nga regalo ni Gloria Arroyo sa kababainhan ang pagpatay kay Rebelyn. Bisan pa man, ginsiling

sang GABRIELA nga indi mag-untat ang kababainhan sa pagpangita sang hustisya para sa mga biktima sang pagpang-abuso seksual pareho niya.

Sadto naman nga Marso 10 nagtipon sa Welcome Rotunda sa Quezon City ang pila ka pulo nga manunudlo nga mga katapu sang Alliance of Concerned Teachers (ACT). Ginhingyo sang mga manunudlo nga hatagan-hustisya ang kamatayon sang kapareho nila nga titser nga si Rebelyn, nga lima ka bulan nga nagatudlo sa St. Peter's College sa Toril, Davao City sang siya dukuton. Suno sa ACT, maluwas kay Rebelyn, 10 manunudlo na ang nangin biktima sang pangpulitika nga pagpamatay kag pagdukot sang mga ahenteng militar halin nga mabutang sa poder si Arroyo sadtong 2001.

Ginainsister naman sa Kongreso nanday Rep. Satur Ocampo kag Rep. Teddy Casino sang Bayan Muna, Rep. Liza Maza kag Rep. Luz Ilagan sang Gabriela Women's Party kag Rep. Rafael Mariano sang Anakpawis ang gilayon nga pagimbestiga sa nasambit nga kaso. Sa Senado, ginsiling ni Sen. Francis Escudero, puno sang Senate Committee on Justice and Human Rights nga dapat arestuhon na ang natumod nga mga kriminal.

Suno naman kay Ambassador Alistair MacDonald sang European Delegation to the Philippines, nagpasa sang isa ka resolusyon sad-



tong Marso 12 ang European Parliament nga nagapanawagan sa gubyernong Arroyo nga untatan na ang mga pagdukot kag ekstrahudisyal nga pagpamatay sa pungsod kag imbestigahan na ang mga ini. Ginsiling ini ni MacDonald sang magtambong siya sa inagurasyon sang ASEAN Human Rights Institutions Website Forum sining Marso 16 sa upisina sang Commission on Human Rights sa Quezon City.

Siling ni MacDonald, nasubuan ang internasyunal nga komunidad bangud ang pagpatay kay Rebelyn nasundan pa sang pagpatay sa aktibista nga kontra-mina nga si Eleazar Billenas kag pagtuyo nga pagpatay sang mamahayag nga si Nilo Labares. Pila ka adlaw lang ang lang-at sang mga kaso nga ini, nga tanan natabo sa Mindanao. Bunga sang mga padayon nga pagpatay kag pagdukot sa mga aktibista, unyonista, mamahayag kag lider-relihiyoso sa pungsod, labi nga nangin negatibo ang imahen sang Pilipinas sa internasyunal nga komunidad, suno kay MacDonald.

Sadtong Marso 12 man mabasog nga ginkunderar sang Amnesty International ang brutal nga pagpatay kay Rebelyn. Ginpamilit naman sang Auckland Philippines Solidarity, isa ka organisasyon nga nagatib-ong sa tawhanong-kinamatarung nga nakabase sa New Zealand, nga dapat untaton na sang mga gubyerno sang New Zealand, Australia, European Union kag US ang paghatag-ayuda sa pulisya kag militar sang Pilipinas.

Protesta batuk sa VFA kag Balikatan, nagalapad

Sa pagpanguna sang Bagong Alyansang Makabayan (BAYAN), ginlunsar sining Marso 17 ang Junk VFA Movement (JVM) agud labi nga pasingkion ang kampanya para ibasura ang Visiting Forces Agreement (VFA). Ginabug-os ang kahublagan nga ini sang mga progresibong grupo, senador, kongresista, abugado kag mga kilala nga personahe. Ginainsister man nila ang pagpalayas sang mga tropang Amerikano halin sa lain-lain nga parte sang pungsod kag ang pagpauntat sang ayuda militar kag pulitikal sang US sa rehimeng Arroyo.

Ginlunsar ang JVM isa ka adlaw makaligad nga gin-anunsyo sang Malacanang nga nagsugilanon sa telepono sanday Gloria Arroyo kag President Barack Obama kon sa diin ginkasugtan kuno nila nga pangapinan ang VFA sa pihak sang lapnagon nga panawagan nga ibasura na ini. Ginkastigo sang JVM si Obama sa iya pagpamilit nga paligunon pa ang VFA kag padayunon ang iban nga polisiya sang pagpasilabot ni anay presidente George W. Bush.

Nagapadayon nga mga protesta. Sadtong Marso 8, bilang pagsalog sa pangkalibutanon nga adlaw sang kababainhang anakbalhas, masobra 10,000 ang nagkadto sa Mendiola agud pamatukan ang bangian nga relasyon sang Pilipinas kag US. Ginainsister nila nga dapat ibalik na si Smith sa kustodiya sang Pilipinas. (Lantawon ang kaangot nga artikulo.)

Nauna na nga nanawagan ang

Gabriela Women's Party nga ikanse-la ang Balikatan kag ibasura ang VFA. Agud hatagan-ligwa ang ila panawagan, ginpresentar ni Rep. Luz Ilagan ang mga pagpang-abuso sang mga suldado nga Amerikano sa Mindanao kon sa diin nauna nga ginlunsar ang Balikatan. Kadaman sa mga kaso nga ini wala pa maresolbar kag ang iban wala man lang maimbestigahan.

Si Arsid Baharun sang Zamboanga City ang isa sa mga napilasan kag napiang sa wala pili nga misyon sang mga suldado nga Amerikano sadtong 2004. Sadto naman nga 2006, nag-angkon sang pilas si Bizma Juhan sa pagpamomba nga ginhimo sang mga tropang Amerikano bilang kabahin sang ila paghanas militar sa Indanan, Sulu.

Sadtong 2002, iligal nga nagsunod sa operasyon militar sang AFP sa Tuburan, Basilan ang isa ka suldado nga Amerikano agud ares-tuhon si Buyongbuyong Isnijal, nga ginaakusahan nga myembro sang Abu Sayyaf. Basta na lang nga ginpalukpan sang suldado nga Amerikano si Isnijal.

Madamo pa nga mga kapareho nga kalakasan nga ginahimo ukon ginpasakupan sang mga suldado nga Amerikano batuk sa mga sibilyan.


Ang Balikatan *exercises* sa Bicol

ginkastigo sa House Resolution (HR) 985 nga ginpresentar sa Kongreso sadtong Pebrero 4. Ginhatagan-tum-ok sini ang pagdamo sang kaso sang abuso sa tawhanong-kinamatarung kag sa kababainhan. Nakasaad man sa resolusyon nga pagagamiton lamang ang Balikatan bilang panaming sa ginaplano nga sarbey agud tukibon ang nakatago nga dunang-manggad sa rehiyon. Ginsundan ini sang HR 417 bahin sa lapnagon nga paglapak sa sobe-ranya sang Pilipinas kag konstitu-syon. Gintumod diri ang pagbasura sa kaso sang biktima sang paglugos nga si "Hazel" sa korte militar sang US sa Okinawa, Japan kag sa korte mismo sang US kag ang pagbalibad sang gubyernong US nga isurender ang kustodiya kay Smith nga napamatbatan nga mabilanggo sadto pa mga 2006.

Sining Marso 11, gintukod ang isa ka alyansa sa Bicol nga ginatawag nga Women's Movement Against Balikatan (WOMB). Ginasimbu-lo sang WOMB ang maatipanong kinaia sang kababainhan nga handa ihatag ang tanan para protektahan ang ila mga anak batuk sa anuman nga kahalitan.

Ginatumod sang WOMB ang isyu sang prostitusyon kag droga nga siling sini ginapalala sang presensya sang mga pwersa sang US sa rehiyon. Gintumod sini ang 97 kaso sang pagpanglugos kag abuso sekswal nga ginpasaka halin 1990 batuk sa mga tropang Amerikano sa Subic kag Clark, Pampanga. Kinse sa mga biktima diri mga pamatanon. Luwas pa diri ang 3,000 kaso sang abuso sekswal sa kababainhan kag pamatanon nga ginpasaka halin 1980 tuhtub 1988. Wala bisan isa nga nalubad sa mga kaso nga ini, kag wala ni isa ka suldado nga Amerikano ang nasilutan.

Sadtong Marso 6, trenta ka mga iloy, upod ang ila mga anak ang naglunsar sang protesta batuk sa VFA sa Manila. AB



Nicole, biktima liwat sang inhustisya

Ginlubag sang mga gubyernong Obama kag Arroyo si Suzette Nicolas, ang Pilipina nga ginlugos sang isa ka suldao nga Amerikano sa Subic, Olongapo City sadtong Nobyembre 2005, agud bawion ang nauna niya nga akusasyon batuk sa suldao. Gin-anunsyo ini sadtong Marso 17 ni Atty. Evalyn Ursua, anay abugado ni Nicolas, mas kilala bilang “Nicole.” Ang balita nagwa kadungan sang paglunsar sang Junk the VFA Movement, kon sa diin isa sa mga organisador si Ursua.

Sa iya bag-o nga pahayag, ginsiling ni Nicole nga wala siya nakasiguro subong kon hungod sa buot niya nga nakighilawas kay Lance Corporal Daniel Smith ukon ginpwera siya sini. Si Smith ang suldao nga Amerikano nga nahugahan nga naglugos sa iya. Ginpaluya sang panibag-o nga panaysa-

yon ang kaso batuk kay Smith.

Ginagamit subong sang guberno sang US kag rehimeng Arroyo ang pag-atras ni Nicole para ibalewala ang lapnagon nga panawagan nga ibasura ang Visiting Forces Agreement (VFA). Ang kaso nga pagpanglugos sang isa ka suldao nga Amerikano sa isa ka Pilipina kag

ang pagbalibad sang US nga mahungon sa bilangguan nga ara sa awtoridad sang Pilipinas ang maysala nga suldao ang nagserbi nga isa ka pinakamainit nga isyu sa likod sang subong nga pagsingki sang panawagan sang pumuluyong Pilipino nga ibasura ang VFA.

Ginsakyan sang rehimeng Obama ang desperasyon ni Arroyo nga matalupangdan siya sang bag-o nga presidente sang US. Pero antes hatagan konswelo ni Obama ang kagustuhan sang nagapakuhitkuhit nga tuta nga matawgan man lang siya sa telepono, ginsiguro anay sang US nga natuman sang rehimeng Arroyo ang tanan nga kinahanglanon nga tikang para mapabilin ang VFA kag mapahaganhagan ang ini sang mga isyu batuk diri.

Salot sa kabuhi kag palangabuhian

Halit sa kabuhi kag palangabuhian sang pumuluyo sa Bikol ang mga operasyon militar nga ginalunsar subong bilang kabahin sang paghanda para sa pagsulod sang mga tropa nga Amerikano nga magapartisipar sa Balikatan *exercises* sa rehiyon sa palaabuton nga Abril. Ini ang ginpahayag sang Ban Balikatan, isa ka rehiyunal nga alyansa kontra sa Balikatan sa Bikol.

Isa sa pinakamabaskog nga ginaoperasyon subong ang prubinsya sang Albay. Ginpwesto na ang 49th IB sa Barangay San Francisco, Legaspi City bilang pwera pangseguridad para sa Balikatan.

Apektado na ang pangabuhian sang mga mangunguma diri bangud indi na sila makatrabaho sa uma. Nagapangulba sila nga bweltahan sang mga nagaoperasyon nga mga suldao.

Nagbaskog man ang militarisasyon sa mga komunidad sa Albay kon sa diin nakadeploy ang Special Operations Team sang 901st IB. Dugang sa ginapatuman nga *cur-*

few, nagpatawag man sang pulong barangay ang mga militar para dumilian ang mga residente nga magentra sa mga paghulag kontra sa Balikatan. Masobra 50 barangay ang ginasakop sang pagpamahog sang mga espesyal nga pwera.

Ginpatawag man sang 901st IB ang tanan nga kapitan sang barangay sa banwa sang Sto. Domingo.

Ginbansagan sang militar ang mga ini bilang “hot spots” bangud sa presensya kuno sang Bag-ong Hangaway sang Banwa sa lugar. Sa Tabaco City, gindagsa sang mga tropa militar ang mga barangay sang Baranghawon, Bongabong, San Roque, Quinastillohan, Bantayan kag Tabiguan. Nagtukod man sang detachment sa Barangay Salvacion, bagay nga nagdulot sang pangulba sa mga residente diri.

Pilit naman nga ginapatambong sa mga pulong-pulong sang militar ang mga residente sa banwa sang Tiwi. Mentinado man ang presensya sang mga tropa sang militar sa mga baybayon nga barangay

sang mga banwa sang Malinao, Malilipot, Bacacay kag Manito.

Indi pa kontento, igapatuman subong ang pagbawal nga mangisda sa lugar bilang tikang pangseguridad sa mga pantalan nga pagadungkaan sang mga barko de-gera sang US. Dugang sang Ban Balikatan, wala pa nagadungka ang barko sang tropa nga US, mabat-yagan na sang mga mangingisda ang gutom kag katalagman.

Sining Marso 3, nagprotesta ang mga militanteng grupo sa atubang sang Department of Agriculture sa Quezon City para ibuyagyag kag pamatukan ang siyam ka oras nga *curfew* nga ginumpisahan nga ipatuman sadtong Pebrero 23 sa mga baybayon nga banwa sang Tiwi, Tabaco kag Malilipot kag ang plano nga ipatuman sang Bureau of Fisheries and Aquatic Resources ang anom ka bulan nga *fishing ban* umpisa Abril 16. Suno kay Fernando Hicap sang Pamalakaya, maathag ini nga pagpatay sa pangabuhian sang mga mangingisda sa ngalan sang RP-US Balikatan exercises kag VFA. **AB**

Sadtong Marso 12, sunud-sunod nga ginpapirmahan kay Nicole ang tatlo ka dokumento: ang una nagasaad nga gin-utod na niya ang pag-abugado sa iya ni Ursua, nga siya ang nagbulig sa iya agud ma-imbestigahan si Smith; ang ikaduha nagapamatuod nga nagbaton siya sang P100,000 nga danyos para sa mga kahalitan nga nahimo sa iya ni Smith kag ginalibre na niya ang suldado sa anuman nga kaso sibil nga mapasaka diri; kag ang ikatlo nagahatag posibilidad nga nagsayup siya nga akusahan si Smith sang paglugos sadtong 2005. Gintawgan ni Obama si Arroyo makaligad nga “maareglo” ini.

Madamo ang nagaduda kon bala hungod-sa-buot nga ginhimo ini tanan ni Nicole. Sadtong Pebrero 26 lamang upod pa siya sa mga nagpasaka sang petisyon sa Korte Suprema para tun-an liwat ang nauna nga desisyon sang korte nga nag-aprubar sa VFA. Nausisaan nga ang naghanda sang tatlo ka dokumento nga ginpirmahan sa Makati City ni Nicole amo ang abugado sa idalom sang Sycip, Salazar, Hernandez and Gatmaitan, ang kumbuyahan nga gin-aprubahan sang US para kaptan ang kaso ni Smith. Gilayon nga ginpalupad si Nicole pakadto sa US kon sa diin ginhimo si-

ya nga “permanente” nga residente. Malayo na siya sa midya kag iya mga abugado kag tagasuporta, kag indi na makuhaan sang matuod niya nga tindog.

Subong nga ginbawi na kuno ni Nicole ang iya una nga mga panaysayon, si-ge na ang pagpanamad sa iya sang mga upisyal sang rehimeng Arroyo sa pagpanguna ni Justice Secretary Raul Gonzalez. Ginapagwa sang mga ini nga kwarta lamang kag ang kahigayunan nga makakadto sa US ang lagas ni Nicole. Nagapang-insulto pa si Gonzalez nga pwede kasuhan subong si Nicole sang pagbinutig sa korte.


Tatlo ka beses na nga nabiktima si Nicole: una, sang siya ginlugos ni Smith; ikaduha, sang magkunsabo ang mga gubyrno sang US kag Pilipinas para sekreto nga sayluhon si Smith halin sa Makati City Jail pakadto sa US Embassy; kag ikatlo, subong pilit nga ginapalubong sa limot sang US kag Malacanang ang kaso nga paglugos sa iya agud idiskaril ang mga pagtinguha sang mga progresibo kag patriyotikong

pwersa nga ibasura ang VFA.

Ginpatingkad sang “Subic rape case” ang pagkabangian, interbensyunista, nagapakanubo kag mapiguson sa mga Pilipino sang VFA, labi na sa arogante nga pagbalibad sang US nga pagaserbihan ni Smith ang iya sentensya sa isa ka kulungan sang Pilipinas.

Pero wala natapos kay Nicole ang paghimakas para maangkon ang katarungan para sa tanan nga mga biktima sang pagpanglugos kag iban pa nga krimen sang mga militar sang US sa mga Pilipino. Siling ni Ursua, “Si Nicole ang sin-o man nga Pilipina nga biktima sang pagpanglugos sang mga suldado nga Amerikano, sadto man ukon sa palaabuton.” Dugang pa niya, sa palaabuton mahimo nga may magatuhaw na naman nga bag-o nga Nicole, gani dapat padayunon ang paghimakas batuk sa VFA kag sa presensya sang mga tropa sang US.

Ang pagpahipos kay Nicole dugang nga rason para padayon kag labi nga ipursiger ang pagbato sang pumuluyong Pilipino sa VFA kag tanan nga iban pa nga bangian, indi patas, interbensyunista kag mapiguson nga mga tratado kag relasyon sang Pilipinas sa US. AB



Mga kababainhan, nagmartsa para sa trabaho

TRABAHO kag alalangay nga relasyon sa tunga sang US kag Pilipinas ang ginaduso sang may 10,000 kababainhan nga nagmartsa pakadto sa Mendiola sadtong Marso 8, Pangkalibutanon nga Adlaw sang Kababainhan nga Anakbalhas. Ginpamunuan ang martsa sang GABRIELA nga nagsaulog sang ika-25 tuig nga anibersaryo sini. Dala ang mga bandera nga lila, puti kag pula, mabaskog man nila nga ginapakamalaut ang mga pagpang-abuso sa mga kinamatarung sang kababainhan kag ang nagadaku nga disempleyo sa kubay sang kababainhan nga mamumugon.

Ginaduso sang kababainhan nga hatagan sang bulig ang mga asawa sang mga mamumugon kag mga iloy nga napahalin sa trabaho bunga sang krisis sa pinansya. Siling nila, sa kada 100 mamumugon

nga napahalin sa trabaho diri sa Pilipinas kag sa gwa sang pungsod, 70 tubtob 80 ang kababainhan.

Ginasinggit man sang kababainhan ang pagbasura sa Visiting Forces Agreement. Ginpakamalaut

nila ang mga pagpang-abuso sang mga suldado nga Amerikano sa kababainhan nga Pilipino.

Naghalin pa sa nagkalainlain nga lugar ang mga demonstrador—Metro Manila, Laguna, Bicol, Baguio, Bacolod City, Iloilo City, Roxas City, General Santos City, Davao City kag ang iban halin pa sa iban nga pungsod pareho sang US, Hongkong, Australia, Japan kag Italy.

Naglunsar man sang rali sa New York City, USA ang masobra 100 kababainhan kag kalalakihan. AB



10 sibilyan, ginpatay sang mga pasista nga militar

Napulo ka sibilyan ang ginpatay sang mga pasista nga militar sa sulod lamang sang isa ka simana. Ginalakipan ini sang isa ka kilala nga lider masa sa Far South Mindanao, walo ka residente sang isa ka barangay sa Davao Oriental kag isa ka mangingisda sa Camarines Sur. Lima naman ka aktibista nga minoriya nga anti-mina sa Surigao del Norte ang gindukot kag wala na makit-an.

Marso 9. Ginpatay sang duha nga nakamotorsiklo nga berdugo sang 27th IB si Eleazer "Boy" Billianes, 47, isa ka lider sang alyansa sang nagapamatuk sa imperyalista nga pagmina sa pungsod labina sa Mindanao. Alas-4 sang hapon sang tiruhon si Billianes samtang nakasakay siya sa iya motorsiklo sa atubang sang tindahan sa Osmena Street, Koronadal City mga 100 metros lang ang kalayuon sa city hall. Nakamaskara ang mga kriminal nga nagpatay sa iya. Antes patyon si Billianes, pila ka beses siya nakabaton sang pagpamahog sa iya kabuhi bangud sa iya paghimakas.

Si Billianes nga taga-Marbel, Koronadal City upisyal sang Farmers Association of South Cotabato, tagapamaba sang South Cotabato Peoples' Alliance for Nationalism and Democracy (Socpand) kag katapo sang Bayan Muna. Pangulo man siya sang Socssargends Alliance for Genuine Development (Socssargends AGENDA), isa ka rehinyunal nga alyansa sa Far South Mindanao Region nga nagapakigbato sa proyekto sang Tampakan Copper-Gold sa South Cotabato. Duha ka dekada nga siya nagapakig-away para sa kaayuhan sang kapalibutan, para sa duta sang katigulangan sang mga pungsudnon nga minoriya nga B'laan kag para



sa mga kinamatarung kag kaayuhan sang pumuluyo sa Far South Mindanao.

Kahimbon sang 27th IB sa pagpamatay ang mga lokal nga gubyerno sang Kiblawan, Davao del Sur; Tampakan, South Cotabato; kag Columbio, Sultan Kudarat sa idalom sang Task Force Kitaco kag ang multinasyunal nga kumpanya sang Xtrata-SMI.

Marso 8. Walo ka sibilyan, kalakip ang isa ka tatlo ka tuig ang edad nga bata ang napatay pagtapos bombahon sang mga eroplano nga OV-10 ang Barangay Batiano sa Baganga, Davao Oriental.

Kalakip sa mga napatay sanday Edna Cagutom, 3, kag si Merly Pakidungan, 38. May iban pa nga napilasan tuga sang pagpamomba. Ang pataratas nga pagpamomba kabahin sang operasyon paglagas kag balos-atake sang militar pagkatapos mapatay ang tatlo ka suldado sa engkwentro nga natabo sadtong kaagahon.

Sadtong adlaw man nga ina gintiro sang mga elemento sang 42nd IB sang Philippine Army si Paciano Bables, isa ka mangunguma, sa Barangay Del Carmen, Lagonoy, Camarines Sur. Alas-3 sang aga sang tiruhon si Bables sang mga elemento sang PA kag CAFGU nga kabahin sang Reengineered Special Operations Team (RSOT) sang 42nd IB. Pagkatapos tiruhon

gintamnan sang himu-himo nga ebidensya si Bables para pagwaon nga nagpang-agaw siya sang pusil, nagbato kag myembro kuno sang BHB. Ginkuhaan sang larawan ang bangkay ni Bables nga may uyat nga pusil para hatagan-rason ang pagpamatay.

Marso 3. Tatlo unipormado nga suldado ang nagkadto sa upisina sang Cordillera Peoples' Alliance (CPA) sa Bulalacao, Mancayan, Benguet. Upisina man ini sang MAQUITACDG kag APIT-TAKO, mga lokal nga tsapter sang CPA. Pilit nga ginapabuksan sang tatlo sa isa ka myembro sang lokal nga tsapter sang CPA ang upisina. Nagbalibad siya.

Ang MAQUITACDG kag APIT-TAKO, madugay na nagapakigbato para sa mga kinamatarung sang pungsodnon nga minoriya nga mangunguma sa Mankayan, sa malapit sa banwa sang Tadian sa Mt. Province kag sa kaiping nga bahin sang Ilocos Sur. Ginapamatukan man nila ang malaparan nga pagmina sa lugar.

Bilang kabahin sang harasment sini, nag-umpisa na nga maghimo sang sarbey ang militar sa Bulalacao kag kuno nagapulupamangkot kon anu-ano nga magagmay nga proyekto ang kinahanglanon sang barangay. Sa Licuan, Abra naman, nakakampo sa mga balay ang militar nga nagahimo sang sarbey. Ginpalawig nila ang ila presensya nga nagadulot sang pangulba sa pumuluyo.

Enero 29 tubtob sa subong. Nadula pa gihapon ang lima ka minoriya nga Mamanwa nga ginadudahan nga gindukot sadtong Enero 29, ang una nga adlaw sang protesta sang ila komunidad kontra sa dalagkuan nga pagmina. Ginbarikadahan sang may 400 Mamanwa ang mga kalsada sa Barangay Taganito, Claver, Surigao del Norte nga



nagaangot sa apat ka dalagku nga minahan sa lokal nga dulungkaan sang barko. Naghalin lamang ang lima ka Mamanwa para magpangita sang pagkaon para sa mga nagbarikada pagkatapos sila magbulig sa pag-obra sang mga tolda nga temporaryo mapanilungan sang mga nagprotesta. Umpisa sadto wala na sila liwat makita sang ila mga kaupdanan.

Mga simbahan, eskwelahan ginakampuhan sang AFP

NABUYAGYAG sa isa ka pag-usisa nga ginhimo sang House Committee on Human Rights sa Baguio City sining Marso 19 nga lapnagon ang pagkampo sang mga elemento sang Armed Forces of the Philippines sa mga pasilidad sang mga sibilyan sa Northern Luzon. Suno sa mga nagtestigo sa pag-usisa, masami ginakampuhan sang mga ngaoperasyon nga militar ang mga eskwelahan, *day care center*, *barangay center* kag pati ang mga simbahan. Ginsugid ini sang mga nagtestigo nga residente sang Mountain Province, Abra, Benguet, Kalinga kag mga prubinsya sa rehiyon sang Ilocos. Ginhambal man sang mga testigo nga pilit nga ginpahalin ang mga tagabaryo kag upisyal sang barangay para magamit sang mga suldado ang amo nga mga pasilidad.

Ginreklamo sang mga nagtestigo nga masami man sila ginabansagan nga mga tagasuporta sang mga komunista. Ginapunggan man ang mga mangunguma nga magtrabaho sa ila nga mga uma para mahawanan ang lugar para sa *aerial bombing*.

Ginpahayag man sa komite ang 16 nga kaso sang pagpang-abuso militar sa rehiyon, kalakip ang pagdukot, harasment, pagpangbakol, surbeylans kag *hamletting*.

Mga aksyong militar sang BHB



Lain-lain nga aksyong militar ang ginlunsar sang Bag-ong Hangaway sang Banwa (BHB) sining ikaduha nga simana sang Marso.

Marso 14. Isa ka suldado sang 1st Special Forces Battalion ang napatay kag isa pa ang napilasan sang tuyuon nila nga salakayon ang temporaryo nga ginahukmungan sang BHB sa Barangay Remedios 2, Mauban, Quezon. Ang nasambit nga yunit ara sa idalom sang 2nd IDPA.

Marso 12. Napilasan ang 14 nga armadong gaway sang gubyrnong Arroyo lakip ang 12 pulis kag duha ka paramilitar sa duha ka separado nga taktikal nga opensiba nga ginlunsar sang Jose Rapsing Command sang BHB-Masbate.

Natabo ang una nga engkwentro sang lambatan sang mga Pulang hangaway sang BHB ang 14-katawo nga 506th Provincial Mobile Group mga alas-11:45 sang aga sa Barangay Pinamangkaan, Mandaon, Masbate. Pito sa mga pulis ang napilasan lakip ang ila lider nga si Chief Insp. Ronald Fullo.

Nadugangan pa ang numero sang mga pilason sang magtuyo nga magtabang ang mga pulis halin sa kaiping nga banwa sang Balud. Pero antes sila makalab-ot sa lugar sang inaway gin-ambus na

sila sa Barangay Paguiran kon sa diin napilasan ang hepe sang pulisya upod ang apat pa sini ka pulis kag duha ka elemento sang 202nd CAA.

Sakay sang helikopter, gindala ang mga pilason sa Masbate Provincial Hospital kag ang malala naman sa Legaspi City.

Marso 11. Hinaras sang isa ka yunit sang BHB ang isa ka detachment sang PNP Regional Mobile Group alas-7:20 sang gab-i sa Barangay Taysan, Legaspi City. Nakaposisyon ang mga gerilyang pwersa mga 20 metros ang kala-yuon sa *barangay hall* nga ginahimo nga detachment sang mga pulis. Sa ila kahadlok wala na makabato ang nakibot nga mga pulis.

Marso 9. Tatlo ka suldado kag isa ka elemento sang Citizens' Armed Forces Geographical Unit (CAFGU) ang napatay sa engkwentro sang pwersang gerilya sang BHB kag mga tropang militar sang 67th IB sa Baganga, Davao Oriental bandang alas-4:30 sang kaagahon. Nakaagaw ang BHB sang isa ka ripleng M16, radyo pangkomunikasyon kag iban pa nga kagamitan militar.

Naglunsar sang mga *clearing operation* ang militar para mapatuman ang konstruksyon sang karsada halin Mati, Davao Oriental tubtub Lingig, Surigao del Sur. Mabaskog nga ginapamatukan sang mga residente sang magkaiping nga mga banwa sang Bagangan, Cateel kag Boston ang nasambit nga proyekto sang gubyrno bangud mga multinasyunal nga korporasyon, mga plantasyon kag kumpanya sang pagmina lang ang makabenepisyo diri. **AB**

Paghimakas agraryo kontra sa kroni ni Arroyo

Padayon ang paghimakas sang mga agsador kag mamumugon sa uma sang SL Agritech Corporation (SLAC) batuk sa mapanghimulos nga pagdumala niini. Sa pihak ini sang mga maniobra sang korporasyon agud dingutan ang demanda sang mga mangunguma kag mamumugon kag idiskaril ang ila paghimakas. Ang SLAC isa ka daku nga agro-korporasyon nga nagabaligya sang mga binhi. Ginapanag-iyahan ini ni Henry Lim, malapit nga kroni ni Gloria Arroyo. May ara ini nga 593-ektaryas nga *seed farm* (talamnan sang binhi) sa Banaybanay kag Lupon, Davao Oriental.

Sadtong Hunyo 11, 2008, nag-piket ang 300 agsador sa atubang sang upisina sang SLAC sa Lupon. Katuyuan sang ila aksyong protesta nga pamatukan ang plano sang pagdumalahan sang SLAC nga baguhon ang relasyon sang pagtrabaho halin sa sistemang agsa kag partehan pakadto sa sistemang suhulan. Ginapamilit man sang mga naga-protesta nga pataason ang suhol sang mga kontraktwal nga mamumugon sa uma halin P80 pakadto sa P200 kada adlaw.


Naglab-ot sang lima ka adlaw ang piket sa pihak sang mabaskog nga harasment kag pagpamahog sang mga gwardya sang SLAC kag pulisya sang Lupon. Sang ulihi napilitan nga atubangon sang maneydsment ang mga nagapiket. Makaligad ang madugay nga negosasyon kag debate gin-atras sang maneydsment ang plano sini nga himuon nga swelduhan nga mga mamumugon ang mga agsador.

Gintukod ang *seed farm* sang SLAC sa Banaybanay sadtong Setyembre 2006. Nagpasugot ang lain-lain nga lokal nga agalon nga mayduta nga paarkilahan sa SLAC ang ila mga hulumayan sa kantidad nga P25,000 kada ektarya kada tuig sa kundisyon nga indi palayason ang ila mga agsador.

Sa idalom sang SLAC, ang mga agsador ginatawag nga mga “ma-

intainer” bisan pa nga ang mga hiliton kaparis lang sa daan. Ginhandang nila ang bilinhan, nagabutang sang pestisidyo sa mga binhi kag nagakay-o sang mga pilapil nga ginaguba sang mga traktora. Ang mga nagaasikaso sa irigasyon sang humayan ginatawag nga “water management controller.”

Sandig sa nakasugtan, magabaton ang mga “maintainer” sang P4,500 kada ektarya. Ginbase ini sa nagaluntad nga partehan sa sistemang agsa sa nasambit nga lugar kon sa diin 15% sang kabilugan nga kita kada ektarya makadto sa agsador. Sa kinaandan, ang katumbas sini amo ang 15 sako sang palay nga nagabalor sang P4,500 base sa P7.50-P8.00 kada kilo nga presyo sang palay. Bangud sa kinaandan tatlo ka ektarya ang ginatatap sang mga



“maintainer,” ang kabilugan nga parte nila dapat magaabot sa P13,000 kada ani. Sa baylo nga ihatag ini, gusto sang maneydsment nga bayaran lang sang P80 kada adlaw ang mga “maintainer.” Luwas sa mabuhinan sang sobra P1,000 kada ani ang ila kita, pagapugaon sang husto sang SLAC ang ila oras kag madulaan na sang kahigayunan ang mga agsador nga maka-“sideline” kag mag-angkon sang dugang nga kita.

Para naman makalikaw ang SLAC nga maghatag sang mga benepisyo sa mga mamumugon, ginapaturan sang SLAC ang sistemang kabo. Diri, may nagamente-nar lang nga 26 ka regular nga empleyado. Ang mga ini nagaserbi nga timlider nga nagakuha kag nagapanweldo sa mga magatrabaho. Ang mga timlider ang magaareglo sa maneydsment bahin sa bayad kada ektarya sang mga pakyawan nga trabaho, pareho halimbawa sang pagpatanom.

Bisan pakyawan ang sistema, pagabayaran sang inadlaw nga sweldo nga P80 ang mga magatrabaho kag ang tanan nga mabilin nga kantidad makadto sa timlider, bisan nga tagakontra lamang ang papel nila kag wala sila nagaupod sa aktwal nga trabaho. Sa sini wala ginakonsidderar sang SLAC nga mga mamumugon nila ang mga nagatrabaho sa sulod sang ila *seed farm* kag makalikaw sila sa paghatag sang mga benepisyo.

Pila ka bulan na nga napasaka sa Sangguniang Bayan sang Lupon ang petisyon nga pataason sa P200 ang inadlaw nga suhol sa mga kontraktwal nga mamumugon sang SLAC. Bangud sa nagapadayon nga paghulag sang mga mamumugon, amat-amat nga ginapataas sang maneydsment ang inadlaw nga sweldo bisan wala sang pirmado nga kasugtan. Sa subong nagalab-ot na ini sang P100 kada adlaw.

Sin-o ang ara sa likod sang SLAC?

ANG tag-iya sang SLAC nga si Henry Lim malapit lunsay kanday Gloria Arroyo kag Arthur Yap, sekretaryo sang Department of Agriculture.

Narehistro ang SLAC sa Securities and Exchange Commission (SEC) sadtong Enero 11, 2001 nga may pang-umpisa nga kapital nga P510,000 lamang. Hinali ini nga nagdaku kag agresibo nga naglapad ang operasyon sa sulod kag guwa sang pungsod sa panahon sang rehimeng Arroyo.

Sadtong Disyembre 2008 gin-aprubahan ni Arroyo ang aplikasyon sini nga malibre sa pagbayad sang buhis sa sulod sang walo ka tuig base sa daku kuno sini nga potensyal nga makadeposito sang dugang nga kapital.


Ang SLAC ang numero uno na subong nga distribyutor sang hybrid nga binhi sa bilog nga pungsod. Nagaeksport man ini sa Malaysia, Singapore, Indonesia, Vietnam kag Bangladesh. Nalabawan na sini ang iban nga higante nga agro-korporasyon pareho sang Bayer, HiRice kag Monsanto bisan pila ka tuig pa lang sa negosyo nga ini.

Si Henry Lim myembro man sang governing council sang Philippine Council for Agriculture, Forestry and National Resources Research and Development (PCARRD) sang DA kag may daku nga papel sa paghimo sang konsepto sang GMA Rice Program sang rehimen.

Sa idalom sini, solo ang *hybrid seed* nga SL-8 nga produkto sang SLAC ang ginpanagtag sang DA. May subsidyo ini nga P1,500 kada sako halin sa DA, gani P2,500 lang ang ginabayad sang mga mangunguma para sa sako sang binhi nga nagabalor sang P4,000.

Tuman ang kaakig sang mga mangunguma nga nagagamit sang SL-8 sini nga nagligad nga tigalanom sa Nueva Ecija sang sobra katemprano nga namulak ang mga binhi kag kuribod ang humay. Napilitan ang mga mangunguma nga gabuton ini kag magbakal liwat sang inugtanom nga binhi nga nagresulta sang dugang nga galastuhan. AB

11 milyon mamumugon sa Pilipinas ang wala sang trabaho



SADTONG Enero, naglab-ot na sa 4.3 milyon mamumugon ang wala ukon nagapangita sang trabaho kag indi 2.9 milyon lang pareho sang upisyal nga report sang rehimeng Arroyo. Dugang ang mga ini sa 6.2 milyon nga daan na nga nareport nga wala ukon nagapangita sang trabaho sadtong nakaligad nga tuig. Kon tingbon, nagalab-ot sa 11.2% (katumbas sang halos 11

milyon mamumugon) ang tantos sang disempleyo sa Pilipinas kag indi 7.7% pareho sang ginreport sa pinakaulihi nga Labor Force Survey. Nagapatong pa diri ang masobra 1.5 milyon bag-o nga gradweyt subong nga bulan sa kolehiyo.


Ang tantos sang disempleyo sa Pilipinas ang isa sa pinakamataas sa bilog nga Southeast Asia. Ini bisan 25% na sang kabilugan nga pwersa sa pangabudlay sa iban nga pungsod na nagtrabaho.

Pinakamataas ang tantos sang disempleyo subong sa Metro Manila (14%) kag Southern Tagalog (10.9%) bangud sa pagsira ukon pagbuhin sang trabaho sa madamo nga kumpanya nga nagaeksport sang malamanupaktura, pangunahon na sa elektroniks, panapton kag mwebles. Padayon kag nagalala pa ang pagpapahalin sa trabaho sa nagkalainlain nga sektor sang ekonomya sa pungsod. Amat-amat man nga nagadamo ang mga napahalin sa trabaho nga migrante nga mamumugon ang nagpalauli na sa Pilipinas.

15 milyon na ang wala sang trabaho sa US

NAGALAPAD kag nagalala ang pagpapahalin sa trabaho sa US. Nagalab-ot na sa 2.6 milyon ang nadulaan sang trabaho humalin Disyembre 2008 ukon 650,000 kada bulan—pinakamataas na sa US umpisa pa sadtong Ikaduha nga Inaway Pangkalibutanon. Nagalab-ot na sa 5.1 milyon ang kabilugan nga isip sang mga nawad-an sang trabaho humalin sang mag-umpisa ang resesyon sadtong ulihi nga kwarto sang 2007.

Suno sa mga upisyal nga istadistika sang US, 13 milyon ukon 8.1% na ang kabilugan nga pwersa sang pangabudlay ang nakalista nga wala trabaho. Nagalab-ot sa masobra 15 milyon ukon 9.3% ang wala sang trabaho sa US kon isipon ang 2.1 milyon wala na gin-upod sa pwersa sa pangabudlay bangud masobra



isa ka tuig nga sila napaslawan sa pagpangita sang trabaho. Da-ku nga isip man (8.6 milyon sadtong Pebrero) ang mga mamumugon kulang sa trabaho. Ginatantya nga magalab-ot sa masobra 10% ang tantos sang disempleyo subong nga tuig.

Samtang, ang pondo nga pangsuporta para sa mga nawad-an sang trabaho ginbuhinan sang 11% tubtob 17% sa 18 estado sa US (kalakip ang 11 estado nga may pinakamalala nga disempleyo). Sa 12 pa nga estado, mentinado lamang ang ginahatag nga suporta sosyal.

Sa paglala sang krisis sa palangabuhian, wala sang trabaho kag wala sang bulig sang gubyrno, nagadamo na ang mga nagapila sa mga organisasyon sang bulig sa kaluoy nga nagapakaon sang libre sa mga nagaantus nga Amerikano. Nagadamo ang nagapalipas na lang sang gab-i sa mga dalanon kag mga parke bangud napalayas na sila sa mga balay nga indi na nila masarangan bayaran labina sang nawad-an na sila sang trabaho.

Samtang, ginatantya nga nagalab-ot na sa sangkatlo sang pumuluyo sang kalibutan ang wala ukon kulang sang trabaho.

Sa pagtaya sang International Labor Organization (ILO), 10 milyon na ang nawad-an sang trabaho sining nagligad nga tuig (ukon masobra 190 milyon na sa kabilugan). Ginatantya nga madugangan pa ini sang 40 milyon subong nga tuig. Maluwas pa diri ang tunga sa bilyon nga kulang ang trabaho kag indi man lang makaabot ang kita sa \$1 kada adlaw, nga indi hamak nga mas manubo sa balor nga kinahanglanon para mabuhi sang disente ang ila mga pamilya.

Sa kabilugan, nagalab-ot na subong sa sangkatlo sang tatlo ka bilyon nga pumuluyo sang kalibutan ang wala ukon kulang sa trabaho. Ang masobra 67% sini yara sa Asia.

3 milyon, nagwelga sa France

TATLO ka milyon ang nagprotesta sa mga karsadahon sa mga syudad sang France umpisa Marso 19 para kundenahon ang wala-aksyon sang rehimen Sarkozy sa pag-antus sang pumuluyo.

Nag-umpisa ang welga sa pag-untat-byahe sang mga tren. Madason sini, nagsira ang mga eskwelahan, upisina, pabrika, ospital kag iban pa nga transportasyon sa welgang bayan nga ginpamunuan sang nagkalainlain nga unyon sa bilog nga pungsod.

Ginaduso nila ang dugang nga sweldo, pag-untat sa pagpahalin sang trabaho sa gubyrno, seguridad sa empleyo kag pagbuhin sa personal nga buhis.

Mabaskog nga ginpakamalaut sang mga unyon ang pagsalbar sang gubyrno sa mga bangko samtang ginagutom kag nagaantus ang mga pumuluyo.

Nagalab-ot na sa duha ka milyon ang nadulaan sang trabaho bangud sa resesyon kag ginatantya nga madugangan pa ini antes matapos ang tuig.

Nagtambak ang gubyrno sang madamo nga militar kag pulis labi na sa Paris, kapitolyo sang France. Ginpangbatuta kag ginbomba sang tubig kag tigas ang mga nagprotesta. Madamo ang nadakop kag ginbilanggo.

Mga mamumugon sang Lepanto Mining, nagpiket

NAGPIKET ang mga mamumugon sang Lepanto Consolidated Mining (LCMC) kag mga tagasuporta nila sa upisina sang kumpanya sa Makati City sadtong Marso 3 para ireklamo ang indi makatarungan nga pagpadalagan sang LCMC kag pagpalapad sang operasyon sang pinakadaku nga minahan sang bulawan sa pungsod.


Ginaduso nila ang pagbasura sa Mining Act of 1995. Gindungan nila ang ila nga protesta sa anibersaryo sang nangin layi ang Mining Act.

Gin-organisa ang piket-protesta nga ini sang Kalipunan ng mga Katutubong Mamamayan ng Pilipinas (KAMP), isa ka pungsudnon nga alyansa sang mga organisasyon sang mga pungsudnon nga minoriya. Ginpasakupan ini sang mga lider sang Lepanto Employees Union (LEU), mga representante sang MACQU-ITACDG, APIT-TAKO-Mankayan, Tignayan dagiti Babbai iti Minasan a Lepanto, Cordillera Peoples Alliance (CPA), mga aktibista nga maki-kapalibutan kag iban pa nga militanteng grupo. Siling nila, dapat untaton na sang kumpanya ang pagguba sang kapalibutan kag pangabuhian sang mga Cordilleran.

Suno kay Junibong Saldo, isa sa mga representante sang LEU, dugang sa mga pag-antus nga dulot sang Mining Act of 1995 ang nagabunal subong nga krisis sa pinansya sa kalibutan bangud ginabuhinan sang 10-15 adlaw ang ila pag-obra. Malala pa diri, wala ginaremit sang LMC sa Social Security System, Philhealth kag Pag-ibig ang mga kontribusyon nga ginakuha sa ila mga sweldo. Wala pa gihapon ginahatag sang kumpanya ang back wages sang mga mamumugon nga napadaog nila sa daan nila nga welga.

Wala naatubang sang mga mamumugon ang mga upisyal sang minahan bangud ginsirado ang pwertahan sang LCMC kag ginbalabagan ini sang mga pulis sang Makati.

AB



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XL Blg. 6
Marso 21, 2009
www.philippinerevolution.net

Editorial

Katarungan para kay Rebelyn Pitao at lahat ng biktima ng pasistang pamamaslang!

Inilibing na si Rebelyn Pitao, anak ni Leoncio "Ka Parago" Pitao, pinuno ng 1st Pulang Bagani Command ng Bagong Hukbong Bayan (BHB) sa Southern Mindanao Region.


Pwersahang dinukot si Rebelyn noong gabi ng Marso 4 habang sakay ng traysikel sa Sityo Bago Aplaya, Barangay Bago Galleria, Davao City. Natagpuan kinabukasan ang kanyang bangkay na lulutang-lutang sa pinagtapunang kanal ng irigasyon sa Purok 5, Barangay San Isidro, Carmen, Davao del Norte. Bago tuluyang patayin, siya ay iginapos, binusalan, ginahasa, pinagsasakal, pinagsasaksak ng *ice pick* at labis na pinagmalupitan.

Walang duda na ang pagpaslang at kalapastanganang ginawa kay Rebelyn ay bahagi ng maruming gerang isinusulong ng Armed Forces of the Philippines (AFP) sa ilalim ng Oplan Bantay Laya. Dahil hindi nito mahuli-huli ang mga gerilya at dahil sa sunud-sunod na pagkatalo ng

reaksyunaryong militar sa BHB, walang awang tinatarget ng AFP ang mga sibilyan. Lalo pa nito ngayong pinarurumi ang digmang isinusulong nito sa pagtatarget ng mga kapamilya ng mga rebolusyonaryo.

Maaalala na noong Hunyo 2008 ay pinatay ng mga sundalo ng AFP ang kapatid ni Ka Parago na si Danilo. Bago pa ito, muntik ding mapatay ng mga elemento ng *death squad* ng AFP ang panganay na anak ng Pulang kumander. Mahigpit ding minamanmanan ng mga ahenteng paniktik ng reaksyunaryong hukbo ang isa pang anak na babae at iba pang myembro ng pamilya ni Ka Parago.

Partikular na tinatarget ng AFP si Ka Parago dahil sa sunud-sunod nitong pagkatalo sa pakikipaglaban sa Pulang Bagani Command na kanyang pinamumunuan. Isinasagawa ng mga berdugong militar ang paniniil sa pamilya ni Ka Parago alinsunod sa atas ng kanilang mga naka-



Mga tampok sa isyung ito...

Pagpaslang kay Rebelyn, umani ng pagkondena PAHINA 3

Balikatan: Salot sa kabuhayan

PAHINA 5

Pakikibakang agraryo laban sa kroni ni Arroyo PAHINA 9

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angba-yan@yahoo.com*